

**COLUMNNA**

# Verd

 AITA DERMONT-STUPAN
 

---

**L'**enviern è passà. La naiv è sa retratga sin la pizza. I chatscha il verd sin la prada. Bel.

**M**a jau sun sco narra da la naiv da primavera. Na sai betg pertge. Sco sche jau na fiss anc betg pronta per la midada. Jau auz l'egliada. La brama ma stira ensi vers ils glatschers, cun ils skis. Partir or da chamonà en il frestg, anc sut tschiel staili, la naiv schelada ans porta. Nus giain sco en trance. Plaunet sa retiran las ultimas stailas en la cleritad dal di. In mund alv e blau. E nus giain e giain vers il piz...

**È** il mund uschè bel e serain sco quai ch'il di sa preschenta oz? U ans dat el da crair alv per nair?

**C**anera. Audas? L'emprim na fas gnanc stim danunder ch'ella vegn. Ma ella è qua. Adina plidad aut! Aviuns militars



che fan lur exercizis. I strasanan las muntognas! Tranteren crais bunamain ch'i sajan passads, ma quaterturna il fracass puspè da l'autra vart, anc pli smanatschond che avant. Na chalani betg bainprest? Tge fanis si qua en il tschiel?

**I**treneschon per la guerra. Na, din els, nus na fashain betg guerra. Nus cumbattain be l'inimi. Inimi? Nua è l'inimi? L'uman chatta adina in inimi, sch'el sa senta mal e vul mussar vers anora quant ferm ch'el è. El n'ha betg paus e crai da

stuaire cumbatter. Mussar cun la forza tgi ch'el saja. Mo atgnamain è el in pau-persdratsch.

**N**a, il mund n'è betg uschè bel sco quai ch'il di sa preschenta oz. Giain a chasa.

**V**e, trid'aura cun chametg e tun. Surtuna quest viers d'aviuns e prendans l'illusiuin che nus sajan enorm buns. Ve, tschajera! Ans prenda la vista ed ans fa avanzar be pass per pass. Adina ans orientond da nov. Palpar davant il nas. Ans prenda la visiun che nus dumognian tut be cun smatgar in pum. Ans bogna cun ina plievgia chauda per che nus drizzian puspè l'egliada sin la terra.

**I** chatscha il verd. Ur'è temp da semnar. Semnar pasch e speranza.

**Aita Dermont-Stupan tira la renta e fa tge ch'i para e plascha.**